

Il soveran vul veser plans concrets

Il project d'in Albiert da giuventetgna svizzer a Laax ei in pass anavon


DAD AUGUSTIN BEELI / ANR

■ **El Grischn dat ei otg talas casas. Ell'entira Val dil Rein inclus la Surselva denton buc ina solia. L'organisaziun Albiert da giuventetgna svizzer vul usa vegnir a Laax.** Cun in εμπrem pass conceda la radunonza communal in credit per planisar ina casa d'albiert cun 166 letgs.

Ils CEO's ein stai presents

Ils 80 presents han giu marveglias d'intervignir detagls dil project. Gliez han els denton retschert mo parzialmein, pertgei ils plans ein aunc buca sin meisa. Lezs sa la suprastanza communal presentat quest atun. Mesjamna sera ha la radunonza communal giu da prender posiziun tier l'idea d'in hotel special che duei vegnir baghegiu a Laax. Ei setratta d'in Albiert da giuventetgna svizzer. Il president communal *Franz Gschwend* haveva communicau questa primavera che la suprastanza seigi en contractivas cull'organisaziun e che lezza seigi interessada da vegnir a Laax. Mesjamna sera ein il CEO *Fredi Gmür* e *René Dobler*, il parura dalla Fundaziun svizra per turissem social, sepresentai avon la radunonza communal e sincerau che Albiert da giuventetgna svizzer fitgassi bugen pei en Surselva.

La suprastanza communal ha dumandau en in εμπrem pass in credit da planisaziun da 200'000 francs. Ina concurrenza da projects duei mussar ils detagls e semtgir ina basa concreta per decider vinavon. Sco quei ch'il president communal ha declarau sepresentass la vischnaunca sco patrana da baghegiar. L'idea preveda da trer a nez la spunda da Darschalè davos il bogn cuvretg Grava. Sil tetg ed ella spunda vegness ei baghegiu ina casa d'albiert cun 166 letgs. Per saver concretisar l'idea vegnan otg biros d'architectura envidai d'inoltrar ina proposta.



Franz Gschwend (enamiez) ha plascher che la radunonza communal ha approbau il credit per planisar igl Albiert da giuventetgna svizzer a Laax. Senier René Dobler e dretg Fredi Gmür, ils responsabels dall'organisaziun.

FOTO A. BEELI

Reto Gurtner: «Situaziun win-win»

Che l'organisaziun Albiert da giuventetgna svizzer ha interess da vegnir en Surselva ha il directur *Fredi Gmür* puntuau en sia presentaziun. El vesi a Laax in grond potenzial ed ina nova purschida per lur hospes e clients. Ei seigi tuttavia buc aschia ch'igl albiert da giuventetgna sedrezzi mo alla giuventetgna. Era seigi ei buc aschia ch'els veglien stuschar dalla vart menaschis existents a Laax. L'Arena Alva SA sco pli gronda gestiunaria d'hotels beneventass perinagada che l'organisaziun vegness. Muort vacanzas ha il CEO *Reto Gurtner* buca saviu esser presents alla radunonza. Il president communal ha prelegiu ina brev dad el. Cun ina posiziun a scret ha il schef dalla Arena Alva SA accentuau sia posiziun persuna

e quella dall'interpresa. «Pil turissem e per la vischnaunca eis ei ina situaziun win-win. Nus essan persuadi che quei ei ina fetg buna caussa per Laax», ei *Gurtner* persuadius.

En Svizra dat ei oz 52 albierts da giuventetgna, quels genereschan rodund 800'000 pernottaziuns ad onn, han 542 emploiai e contonschan in gudogn da menaschi da 46 milliuns francs. Sigl entir mund dat ei 3700 tals albierts ch'ei enconuschents cul num engles «Youth Hostels» en 84 tiaras. Cun in contract a liung cuoz vegness la vischnaunca ad affittar igl implont all'organisaziun che menass quel sin agen quen. Cugl albiert da giuventetgna vegness era il bogn cuvretg Grava integraus el menaschi. La vischnaunca savess spargnar in deficit annual denter 150'000 e 200'000 francs.

Eleger denter otg projects

La vischnaunca stuess aschia ni aschia sanar il bogn cuvretg. Ina expertisa ha mussau che la vischnaunca stuess en mintgacass – era senza albiert da giuventetgna – investir quater milliuns francs per isolaziun e scaldament, igl ei la varianta pli favoreivla. Il bogn cuvretg ha la vischnaunca da Laax inaugurau ils 1982. En quels 35 onns han ins continuadamein stuiu renovar el ed adattar las structures.

Avon la votaziun han ils presents alla radunonza communal tedlau attentamein las explicaziuns dil president communal e dils dus hospes. Lu ha ei dau damondas. Tgei summa che la vischnaunca stuess impunder per quei project, ha *Franz Gschwend* buca vuliu, ed era buca saviu gir. «Ei fuss nunserius sch'ieu numass ina cefra. Pertgei nus havein aunc

nuot concret sin meisa», ha el declarau silla damonda correspudenta. Ina cumissiun neutrala vegn ad evaluar la concurrenza d'architects ed eleger ils otg megliers. Sch'ei va tenor la planisaziun dils termins duess la radunonza communal saver prender posiziun il zercladur 2018 tier il credit da baghegiar. Sch'el soveran approbescha quel savess la casa arver igl uost 2020. Grond traffic supplementar vegni la casa d'albiert buc a caschunar, pertgei ils biars dils hospes – las experienschas en tshels albierts da giuventetgna muossan quei – arrivau culs mieds publics. Quei correspundi al concept persistent ed ecologic dall'organisaziun, ha *Gmür* accentuau.

Halla da parcar per 130 autos

Apropos garascha: La radunonza communal ha aunc giu da prender posiziun tier in ulteriur credit da projectaziun. La vischnaunca vul baghegiar avon la casa da scola ina halla sutterrana da parcar cun plaz per 130 vehichels. Quei sligiass definitiv il problem da parcar en quei areal. Igl implont vegness baghegiu sil plaz tgeitschen. Suenter la fasa da baghegiar vegness il tetg dalla nova halla sutterrana verdegiu e surress sco zona libra. Naven dalla halla da parcar havess ins access direct tier il bogn cuvretg. La radunonza communal ha approbau era quei credit da projectaziun. Tenor il plan da termins savess igl implont esser semtgau sigl avrel 2019. La summa dall'investiziun ei denton era cheu aunc buca clara. La finala ha il soveran aunc giu da decider dus credits per projects concrets che vegnan realisai sigl unviern 2017/18. Primo *Berera* ha presentau siu concept per ina nova illuminaziun d'unviern per Laax. La radunonza communal ha concediu persunter ina summa da 350'000 francs. Vitier ha la radunonza approbau era la damonda da credit dalla fundaziun Pro Laax per la medema summa. En tut impunda Laax cun quei 700'000 francs per ina nova illuminaziun d'unviern esclusiva ed unica en Svizra.

Gudogn e tuttina entradas memia mudestas

Il parlament communal dad Ilanz/Glion ei sefatschentaus cun il quen 2016

■ **(ac) Il parlament dalla vischnaunca dad Ilanz/Glion ha approbau unanimamein la mesjamna vargada il quen communal 2016. Cun in gudogn dad 1,6 milliuns francs siara quei quen in bionton meglier che budgetau. Per mantener igl equiliber finanziar dalla vischnaunca valetescha il president dalla cumissiun da gestiun, *Leo Cathomas*, in augment dil pei da taglia per indispensabels.** Alla vischnaunca dad Ilanz/Glion mauncan entradas annualas da 10 milliuns francs per puder finanziar las investiziuns futuras, amortisar quellas senza stuer emplunar deivets. Da quei avis ei il president dalla cumissiun da gestiun *Leo Cathomas*. El ha priu posiziun la mesjamna vargada avon il parlament communal ch'ei sefatschentaus en sia 32avla sesida cun il quen communal 2016. Per il president dalla cumissiun da gestiun ei in augment dalla taglia communal indispensabels per mantener igl equiliber finanziar dalla vischnaunca a liunga veta. El ei dalla opiniun ch'il potenzial da spargn enteifer il menaschi communal seigi buc aschi gronds. El ha ludau la lavur dalla suprastanza ed administraziun communal che seigien s'engaschadas da reducir ils cuosts. Sulet entras quellas stentas seigi ei reussiu da presentar in quen cun in gudogn dad 1,6 milliuns francs ed in cash flow dad 2,5 milliuns francs. Ella medema direzziun ei il suprastont *Lorenz Alig* s'exprimius. El ha medemamein fatg attent allas stentas

continuuadas dil tgamun communal da tener a mistregn las expensas aschia ch'il quen communal sepresenti in bionton meglier che prognosticau. Tuttina ha *Alig* valetau il cash flow dalla vischnaunca dad Ilanz/Glion per memia pigns en veta allas sfidas finanzialas. El ei dalla opiniun che la vischnaunca stuess nudar in cash flow da passa quater milliuns per puder satisfar allas pretensiuns finanzialas futuras.

Spitgar il pareri d'ordvart

La situaziun finanziara dad Ilanz/Glion ei vegnida paregliada cun quella da Scuol, ina vischnaunca da semeglionta grondezia che noda ina sviulda da 40 milliuns visavi als biebein 30 milliuns dad Ilanz/Glion e che po contonscher il cash-flow garegiu. Il president communal *Aurelio Casanova* ha buca renviu las constataziuns dil parlamentari e dil president dalla cumissiun da gestiun. El ha tschintschau dad in agir da pass per pass e da stentas continuadas da migliurar la situaziun finanziara. Il president communal ha fatg attent allas incaricas parlamentaras che han pretendiu examinaziuns davart il potenzial da spargnar el menaschi communal. El spetga certs impuls da quei pareri e dalla eglia d'ordvart, vesa denton la necessitad dad augmentar las entradas dalla vischnaunca. Il parlament ha la finfinala approbau ton il rapport da gestiun sco il quen communal unanimamein. Medemamein approbau

ha il parlament il quen d'investiziuns che noda investiziuns nettas da 3,6 milliuns francs. Investiziuns in bionton pli bassas che nudadas el preventiv. Diversas inve-

stiziuns previdas ein vegnidadas refretgas aschia ch'il preventiv 2017 quenta cun investiziuns nettas da 7,3 milliuns francs. Enteifer la tractativa parlamentara ei ve-



Alla vischnaunca dad Ilanz/Glion eis ei reussiu da presentar in meglier quen visavi al preventiv. Alla vischnaunca appartegn era la fracziun da Duin.

FOTO A. CADONAU

gniu fatg attent dalla vart dil commember dil parlament *Gieri Darms* che la vischnaunca stuessi cumprar ils vehichels communal e il perimenter dalla vischnaunca. Il president communal ha dau suatientscha alla remarca, ha denton fatg attent alla incumbensa da spargnar e menziunau la differenza dalla offerta indigena viers quella dad ordvart aschia che la suprastanza hagi stuiu preferir l'offerta favoreivla.

Publicitad ha stuiu bandunar la seduta

Ina informaziun per mauns dil parlament ha la presidenta dil parlament *Ursula Brändli* buca vuliu parter cun la publicitad. Ella ha supplicau ils hospes e la pressa da bandunar la sala dalla Casa Cumin. Gronds misteris para il parlament dad Ilanz/Glion lu tuttina buca d'haver intervigniu. Las informaziuns pertuccan il project communal dallas treis vischnauncas Lumnezia, Sursaissa/Mundaun ed Ilanz/Glion per nova infrastruttura turistica egl intschess dil Pèz Mundaun. Informaziuns che las vischnauncas Sursaissa/Mundaun e Lumnezia porschan il vendergis proxim a lur radunonzas communalas. Per evitar ch'ils soverans dallas duas vischnauncas legien las informaziuns ella gassetta avon che las radunonzas ellas duas vischnauncas han intervigniu ils fatgs ha il parlament seschau informar davos escha serrada.